

A Xunta de Goberno, na súa sesión ordinaria 30 de xaneiro de 2026, acordou, entre outros asuntos, aprobar as seguintes:

**BASES DE SUBVENCÍONS PARA A CREACIÓN, O MANTEMENTO E O REFORZO DOS SERVIZOS DE NORMALIZACIÓN LINGÜÍSTICA DIRIXIDAS AOS CONCELLOS E A OUTRAS ENTIDADES LOCAIS DA PROVINCIA DE PONTEVEDRA PARA O ANO 2026 (PROCEDEMENTO SIA 687911)**

A Constitución española establece no seu artigo 3 que “as outras linguas españolas serán tamén oficiais nas respectivas comunidades autónomas de acordo cos seus estatutos”, ademais de recoñecer que as linguas de España son un patrimonio cultural que deberá ser obxecto de respecto e protección.

No artigo 5 do Estatuto de autonomía de Galicia, en consonancia coa Constitución española, establécese que “a lingua propia de Galicia é o galego” e tamén que “os poderes públicos de Galicia garantirán o emprego do galego en todos os planos da vida pública, cultural e informativa e disporán os medios necesarios para facilitar o seu coñecemento.”

No artigo 2 da Lei 3/1983, de 15 de xuño, de normalización lingüística, concrétase que “os poderes públicos de Galicia garantirán o uso normal do galego e do castelán, linguas oficiais da comunidade autónoma galega”. Tamén se establece, no seu artigo 4.1, que “o galego, como lingua propia de Galicia, é lingua oficial das institucións da comunidade autónoma, da súa Administración local e das entidades públicas dependentes da comunidade autónoma.”

A Administración local constitúe unha vía de dinamización lingüística prioritaria, por tratarse da organización administrativa máis próxima e que máis directamente lle transmite a acción pública á cidadanía. Permite aplicar medidas de intervención directa na presenza social da lingua de xeito uniforme, atendendo á poboación e ao territorio, e favorece tamén a planificación individualizada para cada zona, segundo as súas particularidades sociolingüísticas.

Así, no artigo 10.2 da Carta europea das linguas rexionais ou minoritarias, asinada en Estrasburgo o 5 de novembro de 1992, ratificada polo Estado español mediante o instrumento de ratificación, publicado no *Boletín Oficial do Estado* (BOE) núm. 222, do 15 de setembro de 2001, establécese que as autoridades locais se comprometen

a permitir e a fomentar o emprego das linguas rexionais ou minoritarias no marco da Administración local e, en concreto, nas solicitudes, nos textos oficiais, nos debates das súas asembleas e na toponimia, e tamén no resto de actividades que as administracións realicen por si mesmas ou por terceiras persoas para a prestación dos servizos públicos garantidos, segundo se establece no parágrafo 3 deste mesmo artigo.

No artigo 7.1 da Lei 5/1997, de 22 de xullo, de Administración local de Galicia (LALG), dispónse que “o galego, como lingua propia de Galicia, éo tamén da súa Administración local.”

Así mesmo, no Plan xeral de normalización da lingua galega, aprobado por unanimidade no Parlamento de Galicia o 21 de setembro de 2004, contéplanse, entre outros, os seguintes obxectivos referidos á Administración local: “é necesario consolidar o papel normalizador das corporacións locais por medio da xeneralización do uso do galego como principal lingua de traballo e comunicación cos seus administrados.”

Adicionalmente, no artigo 36.1.b da Lei 7/1985, de 2 de abril, reguladora das bases do réxime local, establécese como competencia propia das deputacións a asistencia e a cooperación xurídica, económica e técnica aos concellos, especialmente aos de menor capacidade económica e de xestión, co fin de asegurar a prestación integral e adecuada dos servizos de competencia municipal.

Nesta liña, no artigo 109.1.b da LALG determínanse como competencias propias das deputacións as de prestar asistencia e cooperación xurídica, económica e técnica aos municipios, especialmente aos que teñan menor capacidade económica e de xestión.

En consecuencia, existe interese público en darlle continuidade a esta política pública, activa desde 2017, a través dunha nova convocatoria de subvencións, co obxectivo de consolidar o uso do galego como principal lingua de traballo e de comunicación nos concellos da provincia e coas súas administradas e administrados.

Segundo o exposto, e ao abeiro do establecido na Lei 38/2003, de 17 de novembro, xeral de subvencións (LXS), na Lei 39/2015, de 1 de outubro, do procedemento administrativo común das administracións públicas (LPACAP), na Ordenanza

reguladora de subvencións da Deputación de Pontevedra e na demais normativa aplicable, convócase esta liña de subvencións de acordo coas seguintes

## BASES

### **Primeira. Obxecto e natureza**

Estas bases teñen por obxecto aprobar a convocatoria pola que se rexerá a concesión, seguimento e xustificación das axudas económicas, en réxime de concorrencia non competitiva, destinadas a crear, manter e reforzar os servizos de normalización lingüística dos concellos de menos de 50.000 habitantes e doutras entidades locais da provincia no período que abrangue do 1 de xaneiro ao 31 de decembro de 2026.

### **Segunda. Dotación orzamentaria e réxime económico**

A concesión das subvencións estará suxeita á dispoñibilidade orzamentaria e farase con cargo á aplicación 26/334.3340.462.04 do Orzamento provincial para o ano 2026 por un importe total de douscentos mil (200.000) euros.

### **Terceira. Finalidade**

Esta liña de axudas ten como finalidade consolidar o uso do galego como principal lingua de traballo e de comunicación nos concellos da provincia e coas súas administradas e administrados a través da creación, do mantemento ou do reforzo de servizos de normalización lingüística (SNL) nas entidades previstas na base quinta.

A finalidade principal dos SNL que se acollan a esta convocatoria debe ser a de incrementar o uso e o prestixio da nosa lingua en todos os ámbitos e sectores do termo municipal e non só no seo da propia Administración.

Para os efectos desta subvención considéranse:

- a) Servizo lingüístico: departamento técnico integrado na entidade local, dotado de recursos materiais e humanos, que ten as funcións de planificar, xestionar, executar e avaliar medidas e accións co obxectivo de incrementar o uso da lingua galega en todos os ámbitos de actuación da entidade, tanto interna coma externamente.
- b) Creación dun servizo: contratación de persoal técnico en entidades locais que o 31 de decembro de 2025 non estean dotadas de servizo lingüístico e, polo tanto, non

conten con persoal contratado para este fin. Inclúiranse tamén nesta modalidade aqueles servizos creados no ano 2025 que non percibisen unha subvención ao abeiro da convocatoria dese ano e que continúen coa súa actividade na data de publicación da convocatoria do ano 2026. As entidades locais ás cales lles fose concedida e percibisen unha subvención ao abeiro da convocatoria de 2025 non poderán acceder a unha axuda para a creación dun servizo lingüístico nesta convocatoria.

c) Mantemento dun servizo: dotación de continuidade a un servizo lingüístico creado con anterioridade á data de publicación desta convocatoria de subvencións. Esta modalidade comprende os servizos lingüísticos que como mínimo estivesen en funcionamento desde xaneiro e ata o mes de outubro do ano inmediatamente anterior á publicación desta orde e retomasen a súa ocupación dentro do primeiro trimestre da convocatoria anual.

d) Reforzamento dun servizo: incorporación de máis persoal técnico, mediante a súa contratación, a un servizo lingüístico xa existente na data de publicación desta convocatoria.

#### **Cuarta. Réxime xurídico**

O procedemento establecido para a concesión das axudas é o de concorrencia non competitiva, por esgotamento do crédito. A proposta de concesión formularaa o órgano instrutor, que unicamente deberá comprobar a concorrencia dos requisitos para conceder a subvención, sen que sexa necesario comparar as solicitudes presentadas.

Se o orzamento para esta convocatoria non fose suficiente para asignarlles ás peticións solicitadas, atenderanse aos seguintes criterios automáticos de adxudicación:

- En primeiro lugar, atenderanse as solicitudes realizadas para a creación do SNL.
- En segundo lugar, atenderanse as solicitudes para o mantemento ou o reforzo do SNL coa repartición do crédito dispoñible entre as entidades solicitantes desta liña, rateando, se é o caso, o importe global restante destinado a estas.

Do mesmo xeito, de existir aforro tras a repartición das cantidades, e en función do número e do importe das subvencións solicitadas, as axudas incrementaranse

proporcionalmente ata chegar ao máximo establecido na base sétima desta convocatoria.

A participación neste programa non supoñerá relación contractual ningunha entre a Deputación e o persoal técnico dos SNL municipais.

#### **Quinta. Entidades beneficiarias**

Poderán solicitar esta liña de axudas as entidades públicas que teñan as seguintes características, de acordo coas consideracións establecidas na base terceira:

- En caso de que a axuda se solicite para a creación dun SNL:
  - Poderán solicitar estas subvencións os concellos da provincia de Pontevedra de menos de 50.000 habitantes ou as agrupacións de concellos, mancomunidades ou entidades locais menores da provincia.
- En caso de que a axuda se solicite para o mantemento ou reforzo do SNL:
  - Poderán solicitar esta liña os concellos da provincia de Pontevedra de menos de 50.000 habitantes ou as agrupacións de concellos, mancomunidades ou entidades locais menores da provincia, que no momento da publicación desta convocatoria teñan creado e en funcionamento un servizo lingüístico.
  - Poderán solicitar esta liña os concellos que contén, no momento da publicación desta convocatoria, cun servizo de normalización lingüística activo e que queiran melloralo contratando persoal a maiores ou incrementando a xornada do persoal existente.

Non poderán obter a condición de entidades beneficiarias aqueles concellos nos que conorra algunha das circunstancias ou prohibicións ás que fai referencia a lexislación vixente en materia de subvencións.

As contratacións ou actuacións realizadas ao abeiro destas bases por parte das entidades beneficiarias non implicarán relación laboral, ou de calquera outra natureza, entre as persoas ou as e os profesionais que desenvolvan as accións que constitúen o obxecto deste convenio coa Deputación de Pontevedra, de tal xeito que, por este concepto, non se lle poderá esixir á institución provincial ningunha responsabilidade, nin directa nin subsidiaria.

As entidades beneficiarias das axudas destas bases quedarán obrigadas a cumprir

as disposicións vixentes en materia laboral, de seguridade social e fiscais do persoal contratado por estas para levar a cabo as actividades financiadas.

Serán as entidades locais beneficiarias das subvencións obxecto desta convocatoria as que velen polo cumprimento da normativa fiscal e laboral, así como da de prevención de riscos laborais, e a Deputación quedará exenta de toda responsabilidade das contratacións levadas a cabo ao abeiro deste programa de subvencións.

#### **Sexta. Alcance das axudas**

A través desta convocatoria, as entidades previstas no ámbito subxectivo poderán solicitar axudas para as seguintes liñas específicas:

- A creación dun SNL. Poderán optar a esta axuda os concellos de ata un máximo de 50.000 habitantes ou as agrupacións de concellos, mancomunidades ou entidades locais menores da provincia que non contén con este servizo.
- O mantemento do SNL. Poderán optar os concellos que xa contén con este servizo.
- O reforzo do SNL. Poderán optar os concellos que contén con este servizo e queiran melloralo contratando persoal a maiores ou incrementando a xornada existente.

De acordo co establecido no artigo 23 da Ordenanza xeral de subvencións da Deputación de Pontevedra, consideraranse gastos subvencionables aqueles que de xeito indubidable respondan á natureza da finalidade subvencionada, resulten estritamente necesarios ou estean vinculados ao obxecto do proxecto.

Neste sentido, as subvencións están destinadas a financiar as retribucións do persoal técnico dos SNL das entidades solicitantes ás que vai destinada esta convocatoria. Estas entidades serán as encargadas de pagar directamente as nóminas do persoal técnico e as cotas da Seguridade Social.

#### **Sétima. Contías máximas subvencionables**

As contías máximas subvencionables para cada unha das modalidades son as que se recollen a continuación:

##### **1. Creación do Servizo de Normalización Lingüística**

A Deputación achegaralle a cada entidade solicitante (concello, mancomunidade, entidade local menor ou agrupación de concellos) o 100 % do orzamento de gastos de persoal do SNL no caso de creación do servizo, ata un máximo de trinta e cinco mil (35.000) euros, co compromiso adquirido de manter o devandito servizo nas dúas anualidades seguintes e de dotalo nos seus orzamentos económicos coas cantidades correspondentes polas porcentaxes restantes do seu custo salarial.

O financiamento comprende exclusivamente o custo salarial (é dicir, o salario base, o complemento específico e o de destino e as pagas extra) e a cotización á Seguridade Social; non inclúe outros conceptos, coma a indemnización por cesamento, a produtividade, as gratificacións e outros similares. Os concellos poderán, no seu caso, complementar a cantidade que sexa necesaria ata acadar os salarios correspondentes por esta categoría profesional no concello.

No caso de percibir algunha subvención ou axuda por parte doutras administracións públicas para a mesma finalidade, concorrente coa que se regula nestas bases, os concellos beneficiarios deberán comunicarlle á Deputación de Pontevedra o detalle de cada unha delas e acreditar que a suma total non supera o 100 % do custo salarial das persoas empregadas incorporadas ao concello, incluídas as cotas de cotización á Seguridade Social.

## 2. Mantemento e reforzo do Servizo de Normalización Lingüística

A Deputación achegaralle a cada entidade solicitante o 80 % do orzamento de gastos de persoal do SNL no caso de mantemento do servizo, ata un máximo de vinte cinco mil (25.000,00) euros.

### **Oitava. Perfil técnico e funcións dos servizos de normalización locais**

A actividade dos SNL locais deberán desenvolvela técnicas ou técnicos de normalización lingüística, que deberán ser especialistas con titulación superior en Lingua Galega, polo que deben posuír algunha das seguintes:

- a. Grao en Lingua e Literatura Galegas, grao en Estudos de Galego e Español, grao en Galego e Portugués: Estudos Lingüísticos e Literarios, licenciaturas equivalentes a eses graos ou outras titulacións superiores pertencentes á área de Humanidades ou de Ciencias Xurídicas e Sociais, sempre que posúan tamén o certificado de lingua galega do nivel 5 (Celga 5).

A súa categoría profesional, no seo da Administración, terá que ser a de técnica ou técnico de normalización lingüística e as retribucións deberán ser as correspondentes a esa categoría.

Concretamente, para un SNL de nova creación será preceptivo que posúan a categoría de persoal funcionario A1 ou A2, ou de laboral I ou II.

A súa contratación levarase a cabo mediante un proceso selectivo no que se avaliarán os coñecementos e as capacidades reais e as prácticas das persoas candidatas para o desenvolvemento das funcións do posto de traballo (de acordo coas sinaladas), respectando, en todo caso, os requisitos de igualdade, mérito, capacidade e publicidade.

- b. No caso das entidades que soliciten a subvención para o mantemento dun servizo lingüístico creado antes de 2007 poderán acceder ás subvencións aquelas que contén con persoal fixo que posúa a titulación de mestra ou mestre cun diploma de especialista en Lingua Galega ou co certificado do Curso Superior de Linguaxe Administrativa (se a técnica ou técnico de normalización lingüística está desde esa data; se é posterior, axustarase ao parágrafo ou ás licenciaturas e graos previstos no anterior apartado a) destas bases.

A categoría deberá ser a correspondente á de persoal técnico medio, diplomado, graduado ou licenciado, segundo a titulación que posúa a persoa que desempeña o posto.

As funcións do persoal técnico de normalización lingüística, tanto internas coma externas, serán, entre outras, as seguintes:

Funcións xerais internas:

- ✓ Asesorar a Administración municipal na procura de incrementar o uso e o prestixio da lingua galega.
- ✓ Velar polo cumprimento da lexislación lingüística por parte da institución e, polo tanto, por que se garantan os dereitos lingüísticos da cidadanía.
- ✓ Informar sobre a conveniencia, oportunidade ou método de incorporar accións con obxectivos normalizadores en programas ou accións de diversa índole do concello e colaborar na súa especificación, deseño e materialización.
- ✓ Emitir informes sobre a oportunidade ou conveniencia das accións do concello con respecto ao fomento do uso e do prestixio da lingua galega.

- ✓ Cooperar coa Administración para determinar os perfís lingüísticos necesarios para cada un dos postos de traballo e colaborar nas probas e nos procesos selectivos para que se avalíen convenientemente os coñecementos lingüísticos das persoas aspirantes.

#### Funcións de dinamización sociolingüística:

- ✓ Fomentar o uso do galego no conxunto da sociedade.
- ✓ Planificar, xestionar, executar e avaliar accións a prol da lingua galega no ámbito de influencia da entidade.
- ✓ Propoñer programas dinamizadores e accións concretas que conciencien a sociedade respecto do uso e do prestixio da lingua galega e mais que a impliquen no proceso normalizador.
- ✓ Fomentar o uso do galego no ámbito socioeconómico e, en xeral, en todos os sectores de importancia para a súa repercusión social.
- ✓ Propiciar e xestionar liñas de información, colaboración, coordinación e axuda dirixidas á rede asociativa, empresarial, educativa, xuvenil ou outras para fomentar o uso e o prestixio do idioma galego.
- ✓ Promover e coordinar grupos de persoas interesadas no proceso de normalización lingüística para que funcionen como axentes normalizadores na sociedade.

#### Funcións de formación sociolingüística:

- ✓ Planificar, xestionar, coordinar e difundir a realización de cursos de lingua galega, xerais e específicos, tanto para o persoal da Administración coma para a poboación en xeral ou para os diferentes sectores sociais.
- ✓ Difundir entre a cidadanía materiais que contribúan a promover a extensión do uso do galego lexislación, dereitos e recursos lingüísticos etc.
- ✓ Colaborar no deseño de programas de formación non lingüística para garantir a presenza do galego e de contidos destinados a mellorar as actitudes lingüísticas.

#### Funcións de asesoramento lingüístico interno:

- ✓ Mellorar a calidade lingüística e comunicativa da Administración.
- ✓ Normalizar a imaxe lingüística, fixar criterios lingüísticos para a organización e establecer modelos de documentos administrativos.

- ✓ Revisar e validar lingüisticamente aqueles textos que vaian ter maior difusión, impacto ou permanencia (carteis, folletos, rotulación, anuncios, impresos, publicacións etc.) para garantir a calidade lingüística e o uso dunha linguaxe moderna, democrática e inclusiva.
- ✓ Resolver dúbidas lingüísticas.
- ✓ Elaborar e recomendar materiais específicos, segundo as necesidades dos departamentos.

Funcións de coordinación e apoio entre a Deputación e os concellos:

- ✓ Apoiar e difundir as accións dinamizadoras desenvolvidas pola Deputación de Pontevedra.
- ✓ Coordinarse coa Deputación e con outros concellos para planificar e executar accións conxuntas de normalización.
- ✓ Participar en xuntanzas e encontros de traballo e coordinación que a Deputación convoque e nos grupos de traballo que se creen para planificar accións normalizadoras conxuntas.

### **Novena. Lugar e forma de presentación das solicitudes**

Cada entidade local ou agrupamento de concellos poderá solicitar unha única modalidade de axuda ao abeiro desta convocatoria, obrigatoriamente por vía electrónica a través do formulario normalizado dispoñible na Sede electrónica da Deputación de Pontevedra, <https://sede.depo.gal>, de acordo co establecido nos artigos 14.2 e 16 da LPACAP, e desestimaranse as solicitudes que non cumpran este requisito.

Así mesmo, tendo en conta que a prestación de servizos lingüísticos implica a planificación e o desenvolvemento de actividades de dinamización lingüística, todas as modalidades de axuda incluírán a súa realización. Ademais, serán inadmitidas aquelas solicitudes conxuntas en que non se acredite a realización conxunta dunha actuación ou servizo e que supoñan actuacións independentes en cada entidade local. Nos supostos de mancomunidades, consorcios ou áreas metropolitanas, deberá acreditarse que o servizo se presta de xeito mancomunado, metropolitano ou consorciado e que, en todo caso, non supón unha actuación illada ou independente.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

#### **Décima. Prazo de presentación de solicitudes**

O prazo de presentación de solicitudes será dun (1) mes, contado a partir do día seguinte ao da publicación da convocatoria e do extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións (BDNS).

#### **Décimo primeira. Documentación**

As entidades interesadas deberán achegar, coa solicitude, a seguinte documentación:

- Memoria descriptiva das accións que se levarán a cabo coa axuda solicitada, asinada pola persoa solicitante, na que se detalle:

No caso de creación do SNL:

- Descrición do servizo que se quere implantar.
- Declaración da relación do persoal na que se especifique se se trata de persoal funcionario ou de persoal laboral e a xornada que vai realizar.
- Declaración da titulación académica na que se especifique a titulación: grao/licenciatura/licenciatura mais Celga 5 ou diplomatura/grao (só válido para o caso de mantemento de SNL anteriores a 2007).
- Declaración do grupo, na que se especifique: A1, A2 ou I, II.
- Proxectos, programas e actividades de dinamización planificados.

No caso de mantemento do SNL:

- Descrición do servizo actual co seu alcance e as súas características.
- Declaración da relación do persoal do servizo na que se especifique se se trata de persoal funcionario ou de persoal laboral e a xornada que vai realizar.
- Declaración da titulación académica do persoal na que se especifique a titulación: grao/licenciatura/licenciatura mais Celga 5 ou diplomatura/grao (só válido para o caso de mantemento de SNL anteriores a 2007).

- Declaración do grupo ou grupos do persoal (na que se especifique A1, A2 ou I, II).
- Proxectos, programas e actividades de dinamización planificados.

No caso de reforzo do SNL:

- Descrición do servizo actual e alcance e características do reforzo proposto.
  - Declaración da relación do persoal do servizo actual e do reforzo na que se especifique se se trata de persoal funcionario ou de persoal laboral e da xornada que vai realizar.
  - Declaración da titulación académica do persoal do servizo actual e do reforzo na que se especifique a titulación: grao/licenciatura/licenciatura mais Celga 5 ou diplomatura/grao (só válido para o caso de mantemento de SNL anteriores a 2007).
  - Declaración do grupo ou grupos do persoal do servizo actual e do reforzo (na que se especifique A1, A2 ou I, II).
  - Proxectos, programas e actividades de dinamización planificados.
- Orzamento detallado de gastos, asinado pola persoa solicitante.
  - As agrupacións de concellos, mancomunidades ou entidades locais menores da provincia que se constitúan para o mantemento en común deste servizo presentarán de modo telemático a seguinte documentación:
    - Certificación acreditativa do acordo de solicitude da agrupación de concellos ou convenio de colaboración, encomenda de xestión ou outra figura xurídica que probe no momento da solicitude da subvención que existe a oportuna colaboración administrativa para o fin proposto.
    - Certificación do nomeamento dunha ou dun representante legal para estes efectos.
    - Declaración na que conste o concello que vai recibir o importe da achega e que deberá presentar a documentación para o pagamento e a súa xustificación.
    - Autorización para que a Deputación poida obter as certificacións das administracións tributarias correspondentes e da Tesourería da Seguridade Social. Todos os concellos que se agrupen deben estar ao corrente das súas obrigas tributarias e coa Seguridade Social no momento da concesión.

- Todos os concellos que presenten a solicitude de forma agrupada deben cumprir o previsto nas bases xerais sobre a conta xeral e a súa presentación perante os órganos de control externo.

O concello que forme parte dunha mancomunidade e decida solicitar a subvención individualmente ou agrupado con outro ou outros concellos deberá presentar unha renuncia expresa á prestación do servizo solicitado conxuntamente coa mancomunidade ou coa agrupación de concellos á que pertence.

A documentación complementaria deberá presentarse electronicamente. As entidades interesadas responsabilizaranse da veracidade dos documentos que presenten. Excepcionalmente, a Administración poderá requirir a mostra do documento orixinal para cotexalo coa copia electrónica presentada.

Se algunha das entidades interesadas presenta a documentación complementaria de modo presencial, requiriráselle que a emende a través da súa presentación electrónica. Para estes efectos, considerarase como data de presentación aquela na que se realizase a emenda.

#### **Décimo segunda. Trámites administrativos posteriores á presentación de solicitudes e emenda destas**

Todos os trámites administrativos que as persoas interesadas deban realizar durante a tramitación deste procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

A Sede electrónica ten dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian utilizar non estableza outros modelos específicos. Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos electrónica ou presencialmente segundo a normativa reguladora do procedemento do que se trate. No formulario deberá indicarse, no seu caso, o procedemento para

o que se está a efectuar o trámite. Os modelos están dispoñibles en <https://sede.depo.gal/web/public/dynamic/catalogo/tramitesxenericos>.

#### **Décimo terceira. Notificacións**

As resolucións e actos administrativos notificaranse só por medios electrónicos, nos termos previstos na normativa reguladora do procedemento administrativo común.

As notificacións practicaranse a través da Dirección Electrónica Habilitada única, accesible desde a Sede electrónica da Deputación de Pontevedra, <https://sede.depo.gal>.

As notificacións entenderanse practicadas no momento no que se produza o acceso ao seu contido e entenderanse rexeitadas cando transcorresen 10 días naturais desde a posta a disposición da notificación sen que se acceda a este.

O sistema remitiralles ás entidades solicitantes avisos da posta a disposición das notificacións á conta de correo electrónico indicada na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

Se o envío da notificación electrónica non fose posible por problemas técnicos, a Deputación de Pontevedra practicará a notificación polos medios previstos na normativa reguladora do procedemento administrativo común.

#### **Décimo cuarta. Instrución e resolución do procedemento**

A instrución do procedemento de concesión de subvencións correspóndelle ao Servizo de Normalización Lingüística e Servizos Lingüísticos, desde onde se realizarán de oficio todas as actuacións que se estimen oportunas para a determinación, o coñecemento e a comprobación dos datos necesarios para o correcto outorgamento das subvencións.

Unha vez efectuado o estudo de cada solicitude elaborárase un informe-proposta de concesión de subvencións que, co informe previo de fiscalización da Intervención, se someterá á aprobación do órgano competente, de conformidade co previsto no artigo 19 da Ordenanza xeral de subvencións da Deputación de Pontevedra e no artigo 24 da LXS.

O prazo de resolución será de tres (3) meses desde a finalización do prazo de

presentación das solicitudes.

#### **Décimo quinta. Compatibilidade coa percepción doutras axudas**

A concesión destas subvencións é compatible con outras que se reciban para o mesmo fin; terase en conta que o conxunto de todas elas en ningún caso poderá superar o 100 % do custo da actividade ou do investimento da entidade beneficiaria.

A resolución do procedemento notificaráselles ás entidades interesadas segundo o previsto no artigo 40 da LPACAP.

#### **Décimo sexta. Xustificación**

Unha vez concedida a subvención, as entidades beneficiarias quedarán obrigadas a destinar os fondos percibidos á finalidade concreta para a cal se concederon, de acordo co proxecto achegado na solicitude.

Unha vez notificada a aprobación das subvencións concedidas e realizada a actividade, as entidades beneficiarias deberán xustificalas antes do 28 de febreiro de 2027.

Para cobrar a subvención as entidades deberán presentar a seguinte documentación, obrigatoriamente por medios electrónicos, a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>:

1. En caso de que a subvención se conceda para a creación de novos SNL ou o reforzo dos existentes:
  - ✓ Certificación da persoa responsable da Secretaría ou da Secretaría-Intervención da entidade local, na que se faga constar a contratación ou a modificación do contrato, coas melloras producidas coa incorporación de persoal a maiores ou incrementando a xornada do existente, a duración dos contratos, o pagamento das retribucións e a categoría profesional do persoal técnico do SNL local, ademais das axudas recibidas para a mesma finalidade.
  - ✓ Copia compulsada da titulación requirida e, se é o caso, do Celga 5.
  - ✓ Memoria da realización da actividade e do cumprimento da finalidade da subvención.

- ✓ Acreditación da debida divulgación do financiamento por parte da institución provincial da actividade subvencionada, mediante soportes publicitarios, físicos ou telemáticos que inclúan o logo da Deputación de Pontevedra.
- ✓ Compromiso da entidade do mantemento do SNL durante un tempo mínimo de dous (2) anos desde a data da concesión da axuda ou da creación do servizo, que terá que crearse nun prazo inferior a tres (3) meses desde a súa notificación.

2. No caso das axudas para o mantemento dun servizo lingüístico xa existente:

- ✓ Certificación da persoa responsable da Secretaría ou Secretaría-Intervención da entidade, na que conste que o SNL xa estaba creado na data de publicación desta convocatoria; na que se indique expresamente a data de creación do SNL, o pagamento das retribucións e a categoría profesional do persoal do SNL local; e na que se declaren, así mesmo, as axudas recibidas para a mesma finalidade.
- ✓ Copia compulsada da titulación requirida e, se é o caso, do Celga 5.
- ✓ Memoria da realización da actividade e do cumprimento da finalidade da subvención.
- ✓ Acreditación da debida divulgación do financiamento por parte da institución provincial da actividade subvencionada mediante soportes publicitarios, físicos ou telemáticos que inclúan o logo da Deputación de Pontevedra.
- ✓ Compromiso da entidade do mantemento do SNL durante un tempo mínimo de dous (2) anos desde a data de solicitude da subvención.

Para cobrar a axuda concedida as entidades, no momento do pagamento, deberán estar ao corrente de pago no cumprimento das súas obrigas tributarias (co Estado e coa Comunidade Autónoma), fronte á Seguridade Social e coa Deputación, con anterioridade a ditarse a proposta de resolución de concesión, situación que determinará de oficio a propia institución.

#### **Décimo sétima. Pagamento**

Para pagar a subvención terase en conta o seguinte:

- ✓ En caso de que se xustifiquen gastos polo 100 % do orzamento subvencionado, aboarase a totalidade da subvención.

- ✓ En caso de que se xustifiquen gastos inferiores ao 100 %, aboarase a parte proporcional da subvención.

O pagamento efectuarase por medio dunha transferencia á conta bancaria indicada pola entidade perceptora.

#### **Décimo oitava. Incumprimento**

Se o prazo de xustificación sinalado na base décimo sexta vence sen que a entidade beneficiaria presente a documentación xustificativa, o Servizo de Normalización Lingüística e Servizos Lingüísticos da Deputación de Pontevedra requiriralle a súa presentación no prazo improrrogable de quince (15) días.

A falta de presentación da documentación neste prazo supoñerá a perda da subvención e as demais responsabilidades previstas na LXS.

#### **Décimo novena. Devolución e reintegro**

As subvencións concedidas deberán devolverse ou reintegrarse nos seguintes casos:

- a) Cando se obtivesen falseando as condicións requiridas.
- b) Se non se destinaron aos fins para os que foron concedidas.
- c) Se a entidade beneficiaria incumpre as obrigas asumidas e as condicións fixadas nestas bases.

#### **Vixésima. Órgano de aprobación**

De acordo co establecido na base 16.2 das Bases de execución do Orzamento para o ano 2026 e segundo o establecido no artigo 18 da LXS, o órgano competente para aprobar estas bases é a Xunta de Goberno.

#### **Vixésimo primeira. Publicidade da convocatoria**

Estas bases reguladoras publicaranse no BOPPO e na Sede electrónica da Deputación de Pontevedra (<https://sede.depo.gal>).

Por outra parte, de conformidade co previsto nos artigos 17.3.b e 20.8.a da LXS, o texto da convocatoria enviaráselle á BDNS para a súa publicación nela, que será a que lle dea traslado do seu extracto ao BOPPO.

#### **Vixésimo segunda. Protección de datos**

Os datos persoais recollidos neste procedemento serán obxecto de tratamento por parte da Deputación de Pontevedra, en calidade de órgano responsable, coa finalidade de xestionar este procedemento, verificar os datos e documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado “Normativa aplicable”, dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia.

As persoas interesadas poderán acceder, rectificar ou suprimir os seus datos, exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

### **Vixésimo terceira. Normativa aplicable e dereito supletorio**

As axudas concedidas nesta convocatoria axustaranse ao establecido nela, na LXS, no Real decreto 887/2006, de 22 de xullo, polo que se aproba o Regulamento da LXS, nas Bases de execución do Orzamento para o exercicio 2026 e na Ordenanza xeral de subvencións da Deputación de Pontevedra, publicada no BOPPO núm. 249, de 30 de decembro de 2016.

Con carácter supletorio, rexerán a LPACAP e a Lei 40/2015, de 1 de outubro, de réxime xurídico do sector público.